

四庫全書

集部

欽定四庫全書

集部

初寮集卷三

詳校官庶吉士_臣張溥

侍讀_臣孫球覆勘

謄錄監生_臣鄭啟緒

欽定四庫全書

初寮集卷三

宋 王安中 撰

劄子

請行藉田禮劄子

臣準御史臺牒十月一日文德殿視朝輪當臣轉對者
臣伏覩陛下肇建明堂既訖嚴配乃以十月之吉首行
授歷頒常之禮三代隆典復見今日可謂甚盛之舉矣
臣幸以言語待罪禁林於禮文之事宜因有陳然臣愚

惜淺陋不足以仰窺聖學竊嘗攷之月令文蓋欽授民
時使時以作事者於農事為尤謹夫農天下之本也親
耕之禮事之本也王藉千畝天子三推先農之祀耒耜
之載種耜之獻見於經者其制甚詳昔我太宗肇行是
禮有司告畢猶以不終千畝為恨迄於仁祖惟稼穡是
好明道再藉弁冕舉趾進至十有二跬三公而下咸盡
隴焉神考稽古勅法正茲國南之位哲廟繼志述事榜
以思文之名恭惟累聖所以敷遺陛下者抑又大備時

令之頒此實先務比者迎真慶成臣獲扈清蹕待事郊
次嘗寓天田壇壝榛蕪棟宇摧圯殆不足稱陛下重本
務農之意恭惟陛下天錫勇智自初臨御立經陳紀全
法三代之盛聖治昭格天人同和風雨順序既屢有年
而縉紳之士郊甸之老猶欲拭目朱紘黛耜之觀者蓋
上以不忘列聖之德下欲元元之衆躋于富壽振古如
茲而臣愚欲望陛下申命有司參具典故斷自聖意順
時幸臨若乃仗衛之設賚予之數赦宥之澤則願陛下

約文以就質抑末以隆本必于今無所甚費則久遠可以時行損益之宜惟陛下所詔臣言狂瞽或有可采即乞特降處分討論取旨施行

再薦臺屬劄子

臣今早於崇政殿奏知本臺見闕監察御史一員面蒙聖諭令如李回等以名聞伏見朝奉郎虞弈操守恬淡論議平正累經陛下任使多所聞見昨任監察御史緣陳彥文理會俞棗事令分析弈偶曾說及致俞棗得知

坐此罷去士大夫公論皆謂其過甚微又經恩宥已嘗
叙復知州差遣臣親承聖諭記其人物若蒙召還舊職
實足厭服衆論亦使今為臺屬者知聖恩寬大不以小
過廢人則必皆有自立敢為之氣其于臺綱所補不細
伏乞出自睿斷特賜處分取進止 小貼子 臣與弈
即非親舊實見其奉使河北及為臺屬人皆稱其清直
無所阿附臣今早所論人材中弈又蒙陛下簡記所以
敢具奏聞

論臣寮奏乞推爵劄子

臣竊以慶賞之柄人主所專故書曰惟辟作福而周官太宰特以爵祿之事詔王至于馭富馭貴則惟王之聽而已以是知人臣之分勞固不可自言賞固不可先啟也臣伏覩陛下親灑宸翰申戒濫賞凡不以勞能定等其保明官吏并受賞者以違御筆論又因明堂鉅典告成推恩度越常格申戒官司毋得攀援陳請然則賞無輕重惟務當功朝廷守于上臺臣察于下聖慮一定其

誰敢干臣尚願稍因近事申做一二比者陛下修祖宗
以來太平盛事臨幸西地而雅飾池苑東西八作事材
等官十員輒援例乞推賞恩將作監遂為取旨收接敷
奏夫官以繕完為職若每事邀賞臣恐朝廷官爵有限
不足以待之又中山府路帥臣河北路轉運使以深州
濬壕先事奏請指期上功其役甫休干澤之書亟至深
州數里之城耳所保奏者官三十九員使臣胥吏三十
二人又詆大名五十餘里之隍池為不足比陛下灼見

池苑因舊雅飾深州壕功不大並出宸斷更不推恩此
誠足以杜僥倖之原破經營之計矣然既曰更不推恩
是乃無足賞者則官吏攀援將作監取旨收接帥司漕
臣先事奏請獨可無罔功之罰乎方今懷利之臣造端
興事庶辟置以來賕請媮歲月以糜添給官資積累遽
至顯列財用耗屈復擾齊民將懲此風曷自此始臣愚
欲乞特降處分併賜行遣仍乞申戒有司自今非戰多
軍勝不許申明收接陳乞恩賞事及凡營繕去處不許

先事陳乞候功畢保奏其顯有功效在所優賞即乞臨時出自聖裁降旨取索旌一勸百用尊主勢如此則下安分義時無濫恩操柄不移名器隨重裕民足用其本諸此惟陛下裁擇取進止

論妄興坑冶劄子

臣竊惟自昔神考之世凡山澤之利掌于常平仁民愛物之意具諸成憲陛下親政之初諸路坑冶惟舊係轉運司錢本者自屬漕司外其餘告發檢踏烹煉費用等

並以常平條令從事官無冗員職有常守後因增廣鼓鑄乃于河北河東京東西陝西權差措置坑冶官屬考于初令固曰權差又曰候措置就緒即行減罷積歲于此既無鼓鑄惟陝西河東出自御筆已併歸常平司若河北京東西曾未及省而九路措置之使且復出矣河北之鑿空擾下橫及無辜既已考驗陛下沛然親灑宸翰令具所費所得來上則官司遷延顧待蠹耗財力之迹臣預知其無所逃于睿斷若夫京東西與九路之弊

獨可弗慮乎京東西之近其無異于河北陝西河東者
固不待臣言而後知至于九路之事跨地遼遠體勢甚
重臣敢不為陛下詳言之頃者朝廷遣徐禋往東南措
置銅事其後又並以寶貨禋復命于朝圖繪之數增舊
十倍乃奏請分委所部禋蓋不虞朝廷使之自行也方
禋為此數時峻文移禁錮人吏逼監司守令承認開掘
江西洪州有嚴陽山場苗脉久不興發禋必欲有得不
復愛惜人力開掘深入至命官何據者暴露得疾以斃

最後禮遣屬官監守烹煨僅得鎰銖州縣不得已承認數十兩之額所謂鎰銖者人固疑其所自來而數十兩之額人固疑州縣欲取之他也以此一事言之則九路之數豈皆確然可信哉禮既不免自行計窮情得則使事之外別立說以規自免曰若或得希世珍異古之寶器乞納書藝局坊陞下聖德撫運庥邦萬民惟正之供而珍異古器之入自有司存如禮外臣豈其所職蓋欲挾此以濟欺誕騷擾之計耳遠方異事初或可為弗室

其源害將甚大今訴訟之詞已有願以田沒官者矣矧官屬吏額視發運司舟船人從券給公使之費又不特如河北京東西而已也若夫東南舊來寶藏厲禁嚴密鼓鑄錢貨又有近降御筆令兩司通融趁辦而青碌之類考于明堂第賞之書亦止逐路監司之效設有非泛拋索何必更禪輩侵官臣愚欲望睿慈加惠天下以今來體究河北銅鑛御筆指揮下京東西及禪領九路後來興修坑冶處監司依應體究仍乞檢會陝西河東已

降御筆參酌處分庶幾不失政事之體稍去冗官蠹耗之弊遠近幸甚取進止

賀皇后受冊禮畢劄子

臣某言云云天祚上聖申命碩德仰儷宸極共承宗廟典冊時舉海宇同慶恭惟皇帝陛下以天縱之聖該日就之學致孝述事既興寧考之法度告功報德又備太平之禮樂日月風雨莫不順序草木鳥獸莫不遂性以今準古可謂盛時至于正心誠意之方齊世善俗之教

躬所自厚人之難能日者長秋久虛柄臣屢請眷懷疇
往却拒再三迫于天下之大公始訂國家之彛訓登崇
邦媛用正坤儀若時宮壺之賢鍾慶儒學之胄著龜協
吉禕翟有光上將追二帝三王內助之風下可化九州
四海婦順之道臣蒙睿獎擢在近司職茲藩宣敢自踈
外深惟一人之慶民猶有賴矧此千載之遇臣實預榮
欣忭之情倍萬倫等限官有守不得隨班稱賀瞻望闕
庭臣無任

大獲勝捷劄子

臣于今月六日準入內侍省遞到御前金字牌子遞
角一道伏奉御筆手詔以臣遣發軍馬討蕩奚賊大獲
勝捷特賜獎諭臣即時望闕祇受訖臣竊惟陛下布昭
聖武恢復故疆巍巍成功輝耀今昔臣首膺睿簡付以
重寄而到任之日殘寇犯邊臣累奉成算選將出師載
加討除連日大捷俘斬數萬邊隅肅清實聖德感格天
地助順鋒旗所指迄用有成而臣任大責深勞不掩過

仰繫全度未賜誅斥已為僥倖而復親御翰墨曲示褒嘉雲漢舒華龍鸞絢采不獨光生節室固已榮動新邦誓當碎首捐軀以圖報効

辭免右丞劄子

臣今月二十七日准尚書省劄子奉御筆除臣尚書右丞臣聞命震惶罔知所措竊惟陛下以神聖之資臨蒞天下繼志述事創法立政孝思維則先烈既昭而體道致用鼓衆動化與天同妙且將納一世于希夷清靜之

域則廟堂之上所與朝夕疇咨密勿賡載之臣非學足以知千古識足以明萬微恬愉靖共足協贊熙運不在是列臣頑鈍窳薄蹇淺昧陋材智之下行身猶殆獨蒙陛下察之于隱約之中度越羣臣置諸嚴近北扉東閣三閱歲陰遭時之隆慶典系舉每獲以不腆之詞鋪張閎休膺獎所加未逮于戾而心慮枯索血氣殫耗方欲籲天有請少就完養忽蒙簡注有此誤恩矧文昌綱維政事所寄豈臣疇昔志願所及冥行冒處必至顛隤伏

望聖慈保惠初終許從遷令因加考擇以授經濟之才
庶于聖政有所裨益而犬馬之臣亦安愚分得寬隕越
之憂不勝幸甚臣無任

辭免左丞劄子

臣恭覩御筆除臣尚書左丞聞命震惶不知所措竊以
文昌二轄參輔大政雖聯事合治靡不相須而挈領振
綱固自有序圖任之久原省既詳惟時底績之昭乃始
就陞厥位伏念臣材資甚陋學殖弗豐誤被眷知驟塵

柄用仰維聖治一遵元豐成憲小大傒志不命其承臣
所區區自効者特夙夜匪懈謹法守繩不怠而已稱報
微蔑方玷黜幽重冒遷除必速顛隕伏望睿明旁燭終
始畀矜改命真才以協僉論豈惟寬愚臣超越之懼亦
足彰聖時授受之公臣無任

辭免迎授劄子

臣近具表辭免慶遠軍節度使恩命伏奉批答不允仍
斷來章者臣舊繇孤遠仰被異知發號大廷付之閭寄

師旄齋鉞用侈軍容儒者之榮何以逾此惟是端闈迂
節具著彞章自昔勳勞尚形遜避顧臣么陋敢冒茲寵
所有迎授伏望睿慈特賜寢罷

辭免垂拱殿賜宴劄子

臣伏奉制命除臣慶遠軍節度使考之彞典朝辭日錫
宴垂拱臣力小任重榮懼交并方當夙夜謀維仰副委
寄宴搞異數何敢承克欲望睿慈特賜寢罷臣無任拳
拳之至

辭免檢校少師劄子

臣今月十八日準入內侍省發來金字牌遞伏蒙聖恩賜臣御筆金花牋詔書已降指揮除臣檢校少師依前慶遠軍節度使充上清寶籙宮使兼侍讀者聞命兢兢不知所措伏念臣奮自書生誤膺寄任二年塞外莫補分毫既無赫赫疆理之勞獨謹容容柔附之策雖欲捐軀矢石圖報恩私而天威下臨邊陲自肅罔功弗績久愧空飡已荷矜憐許其罷戍方投誠君父祈即便安

百口徘徊一身羸病所期退伏詎敢僥踰忽拜雲章具
形寵獎矧茲視秩實首三孤經幄邃嚴祠庭秘近皆非
臣愚所可叨冒伏望睿慈追寢成命特降處分檢會臣
前奏換授階官除臣一員在外宮觀不特俯安于私分
庶幾旁協于公言臣無任

謝陳乞換階官宮祠不允劄子

臣今月十三日準入內侍省金字牌遞伏蒙聖恩賜
臣詔書以臣乞減罷換階官除外任宮觀所請宜不允

勿再有陳者冒貢忱誠威尊是瀆幸盼親翰恩隱有加
承命震兢感餘涕賈伏念臣頃緣末學被遇過優服在
禁林久矣文字為職業逮登政地初無議論及邊陲奉
辭來宣責專鎮撫方金人剽奪之後洎蕭幹猖獗之餘
軍務日艱了非本指勉所不習已跨再朞至于新附安
寧鄰封馴弭坐臻即叙盡出聖謨惟是年邁而神易疲
形槁而病輒襲願先汰遣蓋迫衰羸仰荷慈憐曲垂訓
諭永言重費天地之造豈復敢愛犬馬之軀夙夜周旋

第知竭盡初終保惠獨恃生成臣無任

辭免轉官回授第一劄子

臣伏蒙聖恩以哲宗皇帝寶訓成書將轉一官回授者
成編甫上信賞惟行曾是罔功敢忘懇避伏念臣頃從
隱約親被簡知初寘掖垣遂兼史事中繇憲府入直詞
禁猥叨申命寢閱歲時蓋無紉繹筆削之勤而有饗竊
稍食之媿暨蒙殊獎誤塵政地訓典奏御尚何關逮恭
惟陛下體道建極飭正百度一遵元豐成憲以裁抑浮

偽臣惟材下身備四鄰豈異疇曩空官弗績之微輒冒
寵渥邇臣昧利累國是虞伏望聖慈深照惻誠許從寢
罷度授受之際大公出自朝廷則觀聽之間羣下益孚
于德意臣無任

辭免回授第二劄子

臣近蒙聖恩以哲宗皇帝寶訓成書特轉一官回授尋
具劄子辭免伏奉詔書不允者懇辭誤賞蓋出忱誠淵
聽未回俞音尚闕揆義循分彌增踧踖伏念臣頃聯從

橐再秉史筆追逐羣雋之後無裨大典入塵政路行復期歲先訓趣就何力之有乃以前日兼官之末並緣故常需被恩渥夫名器之設所以為天下公而廉隅之崇蓋當自朝廷始儻容虛受實累政體敢憚危懼仰祈遭令伏望睿明旁燭特賜矜從庶幾下得以逃罔功昧利之嫌而上有以副責實抑貪之意臣不勝

辭免回授第三劄子

臣兩具劄子辭免哲宗皇帝寶訓成書轉一官回授恩

例伏蒙聖慈再降詔書不允者勸賞之典必務當功義
或可辭敢避三瀆伏念臣頃在史局初無紬書之勤比
奏成篇了無關預貤恩下逮是則何名矧身在近司動
繫觀聽苟懷冒昧豈不累國仰祈天鑒俯照惓誠終賜
允從以安私分詞殫情迫期於得請臣無任 貼黃
臣伏覩不經進書官辭免回授恩例已有得旨依所乞
者與臣事體一同伏望聖慈矜察特賜寢罷

轉太中大夫辭免第一劄子

臣恭覩御筆以生致渠魁東南救寧宰臣執政官各遷
官一等等者狂寇陸梁上勤南顧興師命使兆自睿謀聖
武布昭下弗及議天地順助將士鼓勇盪平巢穴俘執
渠魁江山清夷四海溢喜臣猥以凡陋之質備數政路
進聞天語退誦宸翰竊闕神略度越百王螢爝之微靡
所自効敢復昧利僥冒慶賞仰祈淵鑒俯照悃誠特寢
誤恩俾安愚分臣無任

辭免轉官第二劄子

臣伏蒙聖慈以臣辭免遷官恩命特降詔書不允者賞必當功古有成訓得非其分義在必辭竊以州邑隋偷竒衷弗察致茲猖獗上軫淵衷兵威所臨則雷霆震薄詔恩所被則雨露涵濡盪定拊循兩無餘策若時經緯獨出神心臣日侍清光親聞聖略尚何所効不命其承乾清坤夷幸預偉觀敢緣邦慶更竊官榮矧舍爵策勲本為將帥之寵而循名責實亘自朝廷之先仰覬睿慈特從遷令俾無虛授用穆公言臣無任

辭免大名帥劄子

臣伏觀制命除臣檢校太保建雄軍節度使大名尹大名府路安撫使加食邑實封者北門重地兵民事劇仰蒙寄任當誓捐糜臣不敢輒辭惟是寵遷視秩仍易將旄命數復隆懼非所稱伏念臣本從疎遠獲際休明入輔出藩每踰分量頃者往撫新邦超授節鉞洎茲罷戍累具控陳今守陪都密邇畿甸豈敢更有僥冒伏望睿明旁燭俯諒忱誠特寢誤恩以允公議臣無任

謝除大資政再任大名府劄子

臣伏奉告命授臣資政殿大學士再任者懇辭弗獲但劇震惶伏念臣材薄智疏旁無攸助自初遭際以至今日皆陛下生成之賜隆天厚地曾未報塞然一違宸極四易歲華守邊中山略殫夙夜蒙恩內徙甫此暮年比傳并門之除當陟太行之險山川暑雨何敢憚勞天日光明乃蒙委照亟收成命就加褒典雲霄在望桑梓非遙圖臣之居莫如此樂伏惟陛下保惠臣辟無有內外

憐臣去國之久察臣立朝之孤寤寐記存終始覆護留
于便近借以寵光恩施君臣之間情逾父子之厚臣敢
不益堅忠節上答聖知臣已具表稱謝去訖云云

待罪乞外任劄子

案此劄子共三首待罪一首
乞外任二首因係一時相因

之事文義連屬原本
併為一題今仍其舊

臣今月十二日準中書省刑房告報王某奉御筆別聽
旨臣承命震灼即時出就城外僧寺聽候處分至當日
晚別無關到出門指揮不敢在城外止宿且還臣所居

次日準尚書省劄子奉御筆王某可令供職伏念臣人
微罪大上累聖知初已席藁近郊仰俟誅戮緣無出門
指揮尚此家居聽命忽蒙親翰復使就職恩深感極淚
盡血隨再念臣本自小官親蒙聖獎擢至嚴近無所稱
効陛下生成如天地教誨如父母而螻蟻之質冥然無
知自蹈不測之誅豈敢上冒恩私苟逃威罰矧玉堂非
念咎之地內務非使過之職設容濫處實玷禁庭伏望
聖慈酌臣罪戾為正典刑以安臣子進退之分取進止

臣頃荷聖知擢參法從出帥入侍五年于此越繇起部
進貳天官未速大呵仰戴全度而臣冒昧積久食浮貽
誚婦姑繼亡曾不累月悲傷耗氣疾病相尋若以恩榮
不思鬼責尚茲黽勉必速顛濟兼臣親奉德音措畫右
選事務凡所奏請悉荷主張簿領綱維畧已就緒伏望
聖慈察臣悃悞本不辭難特賜矜憐除臣河北近鄉一
郡俾就安養承流宣化當既乃心粉骨捐軀不為無日
干冒宸嚴臣無任

臣頃從疏遠猥荷親擢御前召試俾專外制又蒙天獎
改行吏房而臣自供職以來心氣頓耗瘠首屢作益由
才學荒淺不能應猝牽彊思索所以至此竊自惟念遭
遇特異大恩未報不敢求閑出入遞更願自臣始伏望
聖慈除臣一州郡差遣責以吏事俾効尺寸儻因餘力
稍就完養庶幾不至顛越上玷聖知取進止

謝賜酒果等劄子

臣伏蒙聖恩特降御筆賜臣酒果雙角龍茶等臣已望

闕祇受訖伏念臣寒鄉下士分甘藜藿致身崇顯積有
空飡之愧撫師絕塞去國踰年鄙無遠謀以贊聖略攻
苦食淡當先士卒敢期淵眷曲示寵綏寶翰焜煌好賜
分郁上方珍御霑逮新邦帝所鈞天恍迷昔遇捧挹之
餘感涕交并仰惟君父隆天厚地之恩樂與臣子均甘
推食之意不忘孤外有此蕃錫謹當捐軀粉骨上報生
成

謝賜茶合劄子

臣今月二十五日奉御筆金花箋詔書賜臣茶合一具
揀芽小龍茶二片臣已望闕祇受訖寶翰紆華溫言溢
獎錫之珍茗奩以精鏐下拜有光環營動色伏念臣頃
繇親擢出撫戎師踰歲留屯初無奇畫兵農丕叙蓋自
聖謨而渥澤便蕃匪頒狎至永言弗績冒昧已多敢謂
記憐申加好賜伏讀詔語俯矜暑暘俾以雨露之潤濯
此煙塵之餘承命分嘗清風生腋載懷曩日泛雪宣游
舌本流甘宛同昔味頓覺神明之還觀不知身在于邊

陞眷遇之隆雖遠弗間捐糜頂踵莫報大恩

辭宣賜象簡對衣金帶鞍馬劄子

臣近者伏蒙聖慈特降中旨賜臣對衣金帶鞍馬今月初七日正謝蒙恩稠疊無任感懼竊以驛駿効牽已叨蕃錫服章出笥又沐殊榮拜寵稠重撫心震厲伏念臣稟資駑怯賦分單寒組緝非工煖終慙于布帛馳驅弗逮力幾盡于道塗雖有執贄為臣之忠曾微束帶立朝之辨第深憂于負乘敢再辱于匪頒伏惟皇帝陛下明

辨等差愛惜名器謹仲叔繁纓之明訓戒侯人赤芾之深譏盍分畀于三軍俾衆同于挾纊或旁周于羣牧使政杜于駭興收還疊至之誤恩庶保易盈之愚分所有今來賜臣對衣金帶鞍馬不敢祇受臣無任取進止

七日三省同奉旨
依例收受不許辭

奏傳墨卿被旨就觀韓君丈人內傳劄子

今月初三日給事中臣傳墨卿至臣所居稱面奉聖旨就觀韓君丈人內傳臣某臣墨卿焚香盥手讀誦三過

臣某昨遇中元節召宿上清寶錄宮伏蒙宣予御筆韓君丈人內傳乃奉睿旨許臣寫錄是夕帝君將降祥光見于神霄殿之上如雲非雲明爛奪目正類御畫三清清微天帝殿上光相觀者呼舞連拜歎所未覩而光之所直乃在南斗六星之次實神霄都闕天機御省丈人之所治內傳首云壬辰開圖下傳祥光之應豈不昭然若夫玉府西室之藏九天羽童之記昊都蔚陽之崇南極敷華之論自太素渾淪梵氣融結三景植立萬化生

成悉具此書內諱一聞則凡骨可以超昇內宇一識則
七祖可以獲庇況予親覩宸翰家有靈編陛下之所以
賜臣者至矣盡矣然而至文弗可輕漏臣既首蒙開示
乃躬自繕寫緹之什襲不敢示人今者臣墨卿承詔來
觀聞者聳踊萬劫流布自今以始臣名載祕錄重叨榮
遇敢不剗心慕道為國捐軀仰報君師全度之萬一臣
不勝

謝賜玉嬰神變經劄子

臣伏蒙聖慈賜臣高上玉清神霄真王說太一保胎玉
嬰神變妙經一部者臣齋心滌慮入靖焚香誦讀累日
心目惝恍竊以三華隱道元始玉文亦明開圖猶秘于
瓊臺金闕之上壬戌應運乃出于宛利契賢之界法流
虛觀欲問不能豈臣凡愚可闕彷彿恭惟陛下孕真梵
極合妙太初挈維道樞流布慈寶頃在開先之劫光乘
南極位登長生界矜羣迷示現神化乃託質大明之體
降宅寶蓮之坐承玉清之正統應上帝之元嗣自生神

受氣入胎誕形以至開府于五萬五千五百五十五億
天地之上總治神霄之政下應中元福境中國神洲帝
王之位建立大教極度羣生真源浩渺離彼籌量爰于
廣愛大山百曲寶室蒼龍之居晨華之臺虹映海慈之
殿檀林丹光之館閭闕玉京之岫朱陽飛景之宇眉睫
指端如意寶履之間出無量大光明為九華安妃太極
真人左元先伯等天真仙衆演說神氣生道上妙之義
起從大空變化安立天地凝煉飛分應請萬國太一行

神布象却邪合嬰之元玉嬰降生升度朝元應號之序
六十會中諸天祕諱萬聖密語大乘奧旨罔不開露是
宜九帝助生五老錫符天花三獻神芝六生二十四種
之色七十三種之雲晃耀寶圖映照神璽受天人君師
之任延億萬運歷之數然而上至九品聖人下至九地
無窮世界之衆均受道氣形體保神各有儀則而茫昧
久矣隨空有色住五者之見耳目鼻口身意六者之識
搶攘展轉日遠真元豈惟不知道神生氣之本而神不

足御氣氣不足養心因業流浪無所終極甚者淪于鄴
城羅山暘谷泉曲之苦不知出離此陛下所以請命玉
帝來應昌會興立神霄大教而太一保胎玉嬰神變之
經因以下傳于人世走骨之徒臣雖識品塵陋竊謂玉
經降世凡有目有趾之類皆欣嚮悟入道力之所埏埴
真風之所鼓舞八絃靜謐萬物遂茂元元之衆日用不
知咸躋于仁壽之域上帝申命百神受記產祥降嘏以
佑聖躬俾為者成欲者得與天地為常與日月參光本

支蕃昌子孫千億永膺多福自今其始臣名登真錄位
忝近班密受至文闔宗幸遇敢不矢心自誓歸慕希夷
惟孝惟忠圖報道蔭瞻仰宸極臣無任

奏狀

辭免中書舍人奏狀

右臣準東上閤門告報已降告命除臣試中書舍人者
聞命震惶罔知所措竊以代言西掖職峻地清每難潤
色之才必極儒學之選臣性資甚樸文氣弗高昨蒙聖

知試以書命擢貳祕府曾未閱月再紆宸翰遂寘從班
雖仰緣天獎之優虛名暴起而躡時髦之右私分難安
伏乞睿慈特賜追寢所有告命未敢祇受臣無任

辭免同修國史奏狀

右臣準尚書省劄子奉聖旨差臣兼同修國史者聞命
震驚罔知所措恭以哲宗皇帝聰明睿智齊聖廣淵興
孝思于親政之初紹考翼于更化之後聖德大業配諸
天地惟是述史之職宜極一時之選用揚偉績昭示萬

世臣奮身踈遠承學荒陋猥叨推擇俾預修纂雖耆俊接武可資舊聞而寵任踰涯豈宜冒處仰祈天鑒俯諒忱辭追寢誤恩以安愚分所有勅命未敢祇受臣無任

辭免翰林學士奏狀

臣準尚書省劄子奉御筆除臣翰林學士者聞命遽惶罔知所措竊以北門地祕學士職親儒者極榮朝廷高選不辭而受理所未安伏念臣出自寒鄉驟蒙聖簡比從詞掖擢長憲臺學淺智疏迄無稱效徒有罪戾積如

丘山憂畏之心殆成疾疢血氣頓索誦習益荒文字既非所工思慮且復難彊深虞累國豈敢愛身伏望天慈洞照誠懇追還成命改受時髦別除臣一閑慢差遣若依覆幬終獲存全指心誓天九殞圖報所有告命未敢祇受臣無任

辭免翰林學士承旨奏狀

臣今日準東上閣門告報已降告命除臣翰林學士承旨者聞命震惶罔知所措竊以北門東閣獨承密旨

職親地峻實冠儒臣惟時間出之才乃稱非常之選伏
念臣樸拙昧陋久于湮淪親被聖知躡置華近起之既
踣恩厚不訾數對清光更蒙天獎而大號令大封拜皆
特命當制臣之榮遇蓋無前比逡巡退避猶恐弗勝冒
昧超踰其必自殆伏望聖慈洞照危懇追寢成命止令
仍舊待罪詞禁庶安愚分未速顛隳所有告命臣未敢
受臣無任

辭免御史中丞奏狀

右臣準東上閤門告報已降告命除臣侍御史中丞者
聞命震惶罔知所措竊以中司之職紀綱所寄必得剛
明果敢通達國體之臣使居此任則可以上尊主勢下
肅官邪如臣者學淺智疏望輕力薄頃蒙親翰擢寘詞
垣閱歲于茲日虞罪戾若復昧于量已冒處風憲之地
豈特自速顛沛亦將有玷聖知所有告命未敢祇受臣
無任

舉汪伯彥自代奏狀

準令諸侍從官授訖三日舉官一員自代者右臣伏覩
具官汪伯彥積學之富夙有師承屬文之工蔚多華藻
行能兼備流輩所推舉以代臣實允公議謹錄奏聞伏
候勅旨

舉何臬自代奏狀

準令諸侍從官授訖三日舉官一員自代者臣伏覩具
位何臬學問醇深識量高遠端靖之操士論所推舉以
代臣實允公議

舉權邦彥自代奏狀

準令節文諸侍從官授訖三日舉官一員自代者右臣
伏覩承議郎提舉永興軍路學事權邦彥雋傑之譽學
校所推瞻縟之文朝廷可用識慮高遠趨尚正純舉以
代臣實允公議

舉顏岐自代奏狀

準令諸侍從官授訖三日舉官一員自代者右臣伏覩
朝請郎提舉杭州洞霄宮顏岐識度曠夷學問淵博志

尚操領不減古人論議文章猶其餘事若使雍容近列
可以激勸士風臣實不如舉以自代謹錄奏聞伏候勅
旨

論修北嶽廟奏狀

臣竊以北嶽常山分野在趙形勢雄壯鎮壓朔陞昔趙
簡子藏寶符于此山之上而襄子知其下臨代代可取
天祚聖運有自來矣恭惟祖宗肇造之迹實在保塞去
山甚邇王氣是資陛下比詔帥臣繕治嶽祠庶工子來

百神順助然顏圮積歲理難因舊經營欲速慮成簡樸
伏望睿慈申命攸司審視興作增廣規制必令臺門樓
觀繚垣埤堦有同岱宗廟貌之盛慶成之日儻或親灑
宸翰大書扁榜以發山嶽之勝以隆國家之福則神人
幸甚萬世幸甚取進止

中書樞密到狀

索韃右屬臨疆場以居先寒暑載離間門牆而何闊卓
爾甚高山之仰悠然極歸路之長欣承顏之在辰幸委

心之有地方朱明之謹候宜盛福之鼎來恭惟某官稟
準夔之姿輔唐虞之世奮庸能熙于帝載方懋格天之
勛非道不陳于王前遂臻尊主之烈某夙蒙教載猥在
知憐冒九死以乘邊曾乏拊綏之効寬百謫而滿戍實
繫庇賴之私方蒙犯于風埃行瞻望于寫履尚祈衛養
垂副傾翹

謝賜御製酒樽詩表狀

臣伏蒙聖恩以臣近進神霄降聖酒尊詩特賜御筆聖

製詩并序俯同元韻者天親有德誕開挹注之祥帝庸
作歌申錫時幾之勅光生部室感極危衷恭惟皇帝陛
下接統三皇應元九會位履以剛中正體乾以純粹精
和同則無間于天人乃聖而不可知者昭回則為章于
雲漢蓋煥乎其有文焉茲者薦慈殿之嬰香下琳霄之
景馭其暴不改但餘元放之諸壚所飲幾何寧止蔡經
之百石猥緣寵暭獲與偉觀仍因上達之燕音曲示俯
同之寶製天地之有大巧雖莫得以名言日月之照容

光遂益明于趨嚮臣敢不奉為大訓守以闔宗神動天
隨誓永依于妙道雷聲龍見願更紀于真游臣無任

謝賜御詩狀

臣伏蒙聖慈賜臣聖製御筆送行詩一首者師出以律
方從遣戍之勤帝庸作歌更示寵行之渥轅門拜貺戍
旆生光中謝竊以周有采薇之詩因命率以衛中國漢
著大風之詠期得士以守四方聿觀汗簡之傳未若宸
章之麗重紆寶思垂賁羈蹤此蓋伏遇皇帝陛下躬煥

堯文聖兼湯勇俯勵封疆之守肆頒雲漢之篇臣敢不
恭體至懷仰遵成算倣臯陶之賡載雖愧非才繼召虎
之來宣敢忘竭節臣無任

謝喜雪御筵奏狀

并笏
記

上天同雲甫集飛靈之瑞君子有酒肆頒湛露之恩恭
惟皇帝陛下道妙範圍功參化育無遠弗届式從和氣
之游將受厥明嗣有豐年之報溥霑嘉應載浹歡聲臣
等無助變調共叨燕衍徒負屬饜之愧莫知稱效之方

笏記 嘉雪應期慶均下土需雲錫宴恩逮邇臣恭
惟皇帝陛下政叙九疇化通一氣天不愛道方貽率育
之休冬無愆陽乃協屢豐之兆臣共承優渥實預榮懷
敢殫歸美之誠仰報示慈之意



[illegible]

欽定四庫全書

集部

初寮集卷四

詳校官庶吉士臣張溥

侍讀臣孫球覆勘

謄錄舉人臣楊 紹

欽定四庫全書

初寮集卷四

宋 王安中 撰

表

謝除中書舍人表

臣某言秘府高華方蒙親擢掖垣清切亟荷超除初雖
罄於忱辭終莫聞於俞旨具膺寵獎彌劇震惶竊以自
昔言語侍從之臣實典號令文章之任德施威制雖難
名萬化之神墨妙筆精亦足聳四方之聽苟選掄之或

誤知稱愜之為難中謝伏念臣用志甚迂負能弗腆長而無述幾驚過隙之駒冗不見治坐跂垂天之翼昨由官學進陟道山稍窺未見之書遽有非常之遇自天承詔給札試言顧慚骫骳之詞趣就湏臾之頃謂塵燕覽必觸天顏叨再命於九重每紆宸翰閱兩遷於一月遂陟禁塗惟外制以不試而用為優而故事或偶承其乏則免孰如臣者考自帝前恩專出於簡知榮殆無於倫比此蓋伏遇皇帝陛下堯文既煥湯德又新道兼於

天有雷風之鼓舞言惟作命同雲漢之昭回尚廣搜揚
靡遺踈遠厚龍光於草芥極歆艷於縉紳臣敢不深認
生成永思報效匪躬之故素已願於輸忠不命其承益
當堅於報上臣無任

謝除御史中丞表

臣某言代言西掖初乏能稱執法南臺更叨睿選始趣
令於亟拜終莫許於牢辭祇荷寵榮徒深震慄竊以朝
綱所寄昔固歎於難才士氣既卑久弗勝於流俗歷考

古人之行義但專一意以尊君且將通達壅蔽盡下情
蓋以剔抉幽隱為細事山林伏猛藜藿亦以森然金石
無心雷霆必為霽止故下則身無養交充位之誚而上
則君有虛已受言之光中謝伏念臣用志甚迂逢辰特
幸試之潤色實非東里之才率爾論思是乃北方之學
敢圖簡記忽有超除此蓋伏遇皇帝陛下以道觀能用
人惟已知臣好直或由於好學謂臣愚忠猶愈於詐忠
擢居風憲之司俾效芻蕘之智臣敢不仰思眷獎俯激

懦庸傾瀝肺肝僅有萬分之補捐糜頂踵不難九死之從臣無任

謝除翰林學士承旨并宣召表

臣今月十日武翼大夫充學士院待詔馬清臣至臣所居奉宣聖旨召臣入院充學士承旨冠擣文之禁直已誤明揚紆將命之使華更叨趣召紳綏改觀頂踵知歸中謝竊以潤色大猷素極儒臣之選奉承密旨實專人傑之求宋興百六十年於茲壁誌三十三人而已宮蓮

跋燭至空對於七春仙嶺浮鼇或稍遷於一紀顧如名
輩應遴此除矧金鼎玉鉉之元臣與鳳閣鸞臺之近弼
異時東閣接武四賢雖才分之爾殊信詞林之增耀凡
繫推擇實係重輕伏念臣久矣空踈蕭然疲緩獨荷照
臨之逮見收隱約之中入處嚴扉甫踰暮歲震風凌雨
仍慚再造之私蟠地際天尤幸千齡之遇瓊錄面聞於
要訣琅函數授於秘經天動奎鉤俯答蕪謏之韻夜趨
霄極仰瞻颯馭之游况大號之肆敷多一時之特召三

王就第五相策勲定命錫符均釐率土合宮布政授節
邇聯萬年天紀之復元六路師干之泰凱猥緣簡記得
竭鋪張對揚每近於清光慰藉屢形於褒語俾寬幽黜
遂冒寵陞此蓋伏遇皇帝陛下心鑑沖融道樞淵妙因
任原省內獨運於乾剛翕受敷施外靡煩於師錫載加
顯渥用燕羈臣惟聖學之川增復睿文之天縱第知刮
膜竊窺雲漢之昭回曾是嘔心曷效雷風之鼓舞所虞
累國豈敢愛身獨肩論報之思終蹈捐糜之節臣無任

謝除顯謨閣待制表

臣某言出董戎昭分宜冗汰擢參法從恩俾薦留重荷
眷憐靡容懇避德猥隆於草芥心更慄於淵冰中謝伏
念臣學淺知疎才微力薄早預賢關之善養遂塵英彀
之並游兩忘鵬鷃之飛一付鳶魚之察中繇際遇寢備
使令具孚淮海之單辭歷按河山之二部逮聖神之攬
政乃賜召還補省寺之闕員每蒙簡在顏始違於天咫
接驟渥於晝三會謀帥於關南獨受方於朝右後來居

上一軍盡驚未輸橫草之勞遠逼及瓜之代仰煩親詔
曲諭至懷進職西清迄功北道惟先帝藏書之盛雲漢
昭回而高陽制閭之雄金湯險固適今冒昧深所叨踰
此蓋伏遇皇帝陛下平施庶邦寵綏羣辟原省因任乃
君師所以佑下民善貸曲成如天地之能裕萬物故雖
踈遠亦極褒榮臣謹當憑恃國靈申嚴疆政捐糜頂踵
遑暇卹於家為繫積涓埃靡坐媮於年所臣無任

謝除翰林學士并宣召表

臣某言烏臺代匱初塵執法之班鰲禁陞華遽冒摘文
之選紆使駢而錫召哄里巷以縱觀祇荷寵榮惟知震
灼中謝伏念臣學專守已進昧干時窮年隱約之中畢
願棲遲之末支離其德蚤知洪世用之難追琢其章晚
或誤天光之被自蒙簡拔即獲對揚首瞻日月之清明
謂有河山之懿直飛風未遠欲隨鵬翼之高神化潛施
不覺鼠肝之大竊顧非常之遇漸隣可畏之塗典訓誥
者期年心已勞而氣索司紀綱者三月力不逮而神疲

矧茲內務之繁蓋極儒臣之盛不辭而受方虞有識多
士之譏自恕以居殆匪每慕古人之意獨厚生成之賜
重慚因任之言此蓋伏遇皇帝陛下兼愛以臨百工虛
懷而觀衆智裁者傾者各從物性之宜鼓之舞之並入
天機之運乃重眷於單危之際俾收跡於嚴近之游仰
鴻造之不貲捐微生而莫報試之一再已知翰墨之無
奇惠以初終或覲田廬之可遂臣無任

辭免右丞表

臣某言登翊萬幾宜艱厥付疇咨一德乃克有承俯惟
管蒯之求進有淵永之懼敢陳悃悃洊瀆威尊中謝伏
念臣學窺管而不足以見道之全知挈餅而不足以適
時之用獨荷聖神之親擢獲依日月之末光越寘複門
專承基命竭蕪辭之馱馱何裨鼓舞之功師睿訓之丁
寧粗識鋪張之體徒以思慮耗於雕鐫之窘氣志索於
歲月之侵方期力丐於便安固已心甘於頑鈍倍費餅
蒙之惠驟紆綱轄之圖置水而芥為之舟靡堪大受未

牧而祥生於奧茲或非祥伏望皇帝陛下聽察以堯之
聰明用捨以周之陟降量材度德曲昭孤陋之難安詢
事考言更候僉諧之所與追還成命改畀上賢豈惟寬
誤國之憂無弗累知人之哲絕坐歎乎裴李非素願之
敢知稽首遜於夔龍庶俞音之可必臣無任

謝除右丞表

臣某言伏奉告命特授臣尚書右丞兼充神霄玉清萬
壽宮副使尋具陳免蒙降批答不允仍斷來章者代言

東閣已叨密命之承貳政中臺更誤近司之選控忱辭
而雖切被訓旨以加隆祇荷寵榮采增震悸中謝竊以
文昌釐厥庶務委綱轄於二丞元首輔以四隣如股肱
之一體用人當否繫國重輕上焉得原省因任之至權
則朝廷正而百官正下焉有同寅協恭之誠意則衆賢
和而萬物和矧遇聖神之興具昭功化之敏以繼前人
之志則所受休畢以善一世之俗則咸克勸忱若室既
堂我則肯構如材已斲爾其塗丹載觀政事之惟醇固

謝智謀而不用必慎厥與以俟知微知章之賢俾率有
陳庶迪惟幾惟康之助伏念臣器拘近用學昧大方晚
出寒鄉無先容之一介獨超俊軌閱再閏而六遷粵從
晝接之初已形柄用之意容其慙直以振兩河之氣稱
其文彩以為二禁之華琳闕羣趨偕弼臣而賜篆龍峯
夜入紆宸藻以垂謨護持尤費於大恩長養用成於今
日擢參國論蔽自聖心人實後來寧免積薪之議政多
末學深虞製錦之傷此蓋伏遇皇帝陛下體乾以純粹

精位履以剛中正欲一日二日之萬幾無曠永綏攸暨
之民合六德九德而百工惟時胥樂思皇之士既延登
於人傑共欽亮於天工兼收孤孑之蹤將試贊襄之效
臣敢不仰思殊眷俯竭愚忠雖久侍清光信其臣之莫
及而日聞獨斷蓋惟道之是從顧已誓於捐軀當弗渝
於報上臨下有赫實聞斯言臣無任

辭免左丞表

臣某言伏蒙聖慈除臣尚書左丞尋具劄子辭免恩命

特降詔書不允者贊襄無補蔑聞已試之功圖任有加
誤玷頻虛之位爰瀝囊封之懇載紆詔檢之華輒罄終
辭覲回定命中謝伏念臣智不周於庶務學未造於大
原猥緣際遇之殊寔被獎知之渥越登四近坐閱再晷
德愈盛而日新顧何施於爝火任已重而道遠徒自窘
於搶榆方需幽黜之嚴敢冒次遷之寵舉直錯枉而選
於衆必得股肱之良陳力就列而止不能是惟犬馬之
願伏望皇帝陛下睿明俯照淵度并容允茲遷令之祈

寬乃妨賢之慮終始慎厥與武昭庭陟之公左右惟其
人務俾師虞之穆臣無任

謝除左丞表

臣某言伏奉告命特授臣守尚書左丞加食邑四百戶
食實封一百戶尋具陳免蒙降批答不允仍斷來章者
中詔班朝載預疇咨之列左綱虛位肆叨叙進之榮雖
游達於遜幽訖莫回於渙綽祇膺眷渥深積震惶中謝
竊以天地辨位而君臣之義明帝王執要而政事之經

立蓋本在上而末在下故臣必致詳惟統有宗而會有
元則事皆隨舉矧冠疑丞之任實顯管轄之司處乎道
揆法守之間諉以謨明弼諧之重倘非試可不以次遷
伏念臣晚出寒鄉初無他技一官効智幾遂陸沉九牧
知名悉緣天獎寘彼雲霄之寥廓振於風雨之震搖粵
繇二禁之嚴進翊萬幾之密若時聖治丕紹燕謀飭寢
綦之規則念每見於羹牆守既成之憲則堅弗渝於金
石循名責實官無冗濫之員理財正辭國有經常之用

凡曰儀刑之典端如卜筮之孚觀聖王於其燦然固已
邁鳬鷺假樂之盛在賢人識其大者幸復見貞觀開元
之隆依光坐閱於再暮撫事猶懷於昔論曾是奉承之
未必知稱塞之難江漢濯之寧復潢汙之尚日月出矣
詎須螢燭之持獨負愧於空餐久分從於幽黜仰繫全
度更冒褒陞廊廟同時半用河山之士股肱在列偕來
翰墨之林此蓋伏遇皇帝陛下秉執道樞懋昭智燭翕
受敷施以就衆德因任原省以協至公於萬斯年式永

孝思之祐曰三有俊共釐帝命之休俾參備於機衡迺
兼容於管蒯臣敢不恪遵明訓圖報大恩職思其憂退
益勤於載采言可底績進弗替於輸忠降監在茲周旋
以是臣無任

帥燕到任表

臣某言近奉御筆令疾速之任於七月六日治事訖師
干護塞俾當涿鹿之衝儒服宣風兼鎮盧龍之舊問諸
故俗撫以寬條中謝伏念臣承學未優負能尤薄煨塵

弗耀初敢急於人間天日所昭晚乃參於世用自陪國
論屢閱歲陰西被東漸莫贊敷文之治南征北伐何裨
經武之圖身雖備數於廊廟之臣上亦不責以軍旅之
事屬新疆之載拓須近輔以來臨委後務於會元按前
世平淮之實納新年之餘慶遵本朝下蜀之規猥承遣
戍之嚴兼冒授方之渥臨門過節仍蕃郊宴之儀馳驛
賜詩并侈鄉隣之寵赴屯於外請汰輒留逮遄六月之
行既命十連之率飛芻輓粟方遠畧之是資緩帶輕裘

顧諸生之安用第憑廟算式遏邊虞此盖伏遇皇帝陛下駿惠先猷詡揚獨智雷聲龍見大伸震曜之神地闢天開包有幅員之廣因加試可就董戎昭臣敢不祇奉聖謨勤宣德澤無遠弗届願聞去殺之期咸與惟新亟迪變夷之效

辭免大名帥表

臣某言伏奉制命除臣大名尹大名府路安撫使尋具辭免檢校太保建雄軍節度使復蒙聖慈特降詔書不

允者遠戍踐更真祠屏處復畀兵民之寄已誤觀能既
兼將帥之榮敢饗加命游書悃懇終冀矜從伏念臣晚
奮寒鄉親逢盛旦進聯綱轄每負愧於空餐出撫疆圻
第偷安於無事茲竊燕申之幸稍期疲曳之休載奉明
綸俾司留鑰官稱惟舊尚多昧利之慚恩渥增隆實重
踰涯之懼事非宜得義則可辭伏望皇帝陛下允輯師
言特回渙號使易盈之小器或免顛隳則未泯之餘生
尚能補報臣無任

謝知大名府表

臣某言中山重地已玷蕃宣全魏名都更叨居守仰服
訓詞之厚俯忘道路之勤祇見吏民敢遑夙夜中謝伏
念臣本無他技粗守朴忠靡緣一介之先容親遇千齡
之嘉會稍蒙劇使即簡異知寢躋嚴近之塗終乏將明
之畧上辭機務規小已之便安改付邊藩出大君之特
達歲時坐閱罪戾是虞豐年閭里之寧敢言已力治世
封疆之肅肇自聖謀豈圖不腆之才進冒非常之寵惟

北門之巨屏居四鎮之上游紫蓋黃旗接帝城之蔥鬱
玉符金鑰乘輦路之深嚴若時撫馭之臣相望典刑之
老臣無何者今乃得之皇皇者華未改行臺之舊多多
益辦竊慚開幕之雄獨欣汶水之非遙實幸菟裘之可
卜此蓋伏遇皇帝陛下欽明旁燭睿智無周善貸曲成
如天地之裕萬物原省因任作君師以佑下民謂臣來
朔部之頻眷此去東州之邇用捐寄委以示恩私臣敢
不竭節首公悉心體國冀綱維之少就或桴鼓之稀鳴

克壯其猷雖自強於蒲柳不能者止終有請於粉榆臣
無任

謝除大資再任知大名府表

臣某言明綸洊降假舊服於陪京寵數兼崇進隆名於
秘殿忱辭雖罄淵聽莫回內惟一已之叨榮外俾兩河
之改觀感深夙夕媿溢心顏中謝伏念臣本乏異能偶
逢興運片言可績寢蒙特達之知小諒既孚驟玷弼諧
之任曩辭帷幄迭畀珪符朞年筦鑰之司未聞報政咫

尺冕旒之照每俟黜幽矐茲封畢萬之都夫豈借寇恂
之地矧邃嚴之東序列耆俊於累朝併荷誤恩更遷近
職周邦徒喜于蕃實覲於甫申公綽何優為老或宜於
趙魏此蓋伏遇皇帝陛下迪知衆志因任庶工摩義漸
仁俗有久安之化賜金增秩吏無數易之勤方求舊以
圖功亦念勞而申命臣敢不益堅忠節仰體聖心弭盜
訓兵少効撫綏之畧愛民重本庶臻安靜之風臣無任

謝除檢校少保表

臣某言伏奉告命除授臣檢校少保尋具辭免恭承御
筆手詔所請宜不允仍斷來章者中軍謀帥已叨漢代
之崇亞保視儀載躡周廷之峻雖罄忱辭之確重紆寶
翰之華拜命增榮捫心益愧中謝伏念臣頃從末至誤
簡異知遍叅法從之嚴遂秉政機之要第縻歲月無補
涓埃屬新邦來復於版圖需近輔徃釐於疆理蔽由聖
選付以戎昭敷文德以格苗民既乏贊襄之効撫成師
而定燕國有慚臨遣之光當弭節以留屯屢抗章而丐

罷千里出塞俾遄遠戍之行五月渡瀘遂約輕齎之入
方布勞徠還定之政甫登康樂安平之書猥緣後務之
留亦玷司盟之賞焦頭爛額初何有於徙薪毀瓦畫墁
詎可言於食志雖曰湛恩之溥逮實非小已之宜蒙偶
逋寇之干誅整偏師而薄伐朝晡再捷沙漠亦空倚李
祐以成功但守用降之策先曹參而書最敢專發縱之
勞會吉語之上聞攬遜章而親報具祇寵獎已即欽承
此蓋伏遇皇帝陛下內廣堯仁外昭湯勇神武不殺坐

開萬里之疆慶賜遂行特享四鄰之澤雖如羈遠亦在
記憐臣敢不益竭思維少圖報塞貳公弘化方隆乘障
之權五教敬敷庶迪移風之效

辭免檢校少師表

臣某言伏奉御筆手詔已降指揮除臣檢校少師依前
慶遠軍節度使充上清寶籙宮使兼侍讀尋具劄子辭
免伏蒙聖慈特降御筆金花牋詔書不允者冒貢忱辭
冀回渙號申領親詔尚闕俞音終難誤寵之饗敢避天

威之瀆中謝伏念臣蚤緣懣學寢簡異知再歲乘邊第
守平平之策一身扶病迄無赫赫之名茲滿戍以言旋
分投閑而自弛遽承訓指超進班聯侍瓊錄之殊庭備
金華之舊列蓋前此優賢知之禮乃舉以休疆場之勞儻
昧利以偷安臣之罪也知罔功而懇避天必從之伏望
皇帝陛下智燭兼明道心博愛俯監由衷之請曲垂遷
令之私息此微生許畢桑榆之景自今餘日誓殫獻畝
之忠臣無任

謝除檢校少師表

臣某言伏奉制命除授臣檢校少師依前慶遠軍節度使充上清寶籙宮使兼侍讀尋具陳免奉御筆批答依已降親札手詔不許辭免仍不得再有陳請者撫新疆而滿戍方遄收召之音渙大號以疏恩更厚來歸之禮每竭忱辭之貢祇勤親翰之紆亟拜寵光第懷震越中謝伏念臣頃繇孤進寢簡異知牽課文詞猶曰平生之學贊襄政事果無已試之能會謀帥於封圻遽受成於

帷幄侏儒扞敵不勝誤國之憂匹馬渡瀘敢作全軀之
計殊俗認勿疑之信懦夫規無事之安賴聖澤之滂流
格邊虞之耆定包虎皮而橐弓矢種落一家挽天河以
洗甲兵農桑千里常武既歌於就緒出車爰賦於勤歸
分若子年心常居於魏闕誰期定遠身復到於酒泉幸
休一障之乘仍趣九霄之覲陞眎班於左棘留偃節於
中都進讀邇英曾是論思之地侍祠寶錄乃嘗受度之
廷比奉昕朝載康玉色實畝實藉具昭經始之艱難靡

室靡家尚軫向來之落莫惟時茂渥疇克欽承此蓋伏
過皇帝陛下妙道無方沈幾不測福威惟辟獨操厲世
之權鼓舞盡神深得馭臣之術憐此軒墀之舊弛於塞
漠之衝惠以餘生錫之多祉臣敢不俯堅晚節仰報隆
私誦述詩書歸美一人之德精勤香火祝延萬壽之祺
臣無任

謝除檢校少傅表

臣某言伏奉告命除臣檢校少傅尋具劄子辭免準入

內內侍省發來御前金字牌遞恭承詔書所請宜不允者明廷誕告誤陞弘化之聯溫檢申頌未遂由衷之請敢期從欲洊瀆蓋高中謝伏念臣奮自諸生親逢熙旦為功名而投筆多求蚤陋於班超資翰墨以入關始望殆踰於文本比自四隣之列出宣三路之威屬殘霄之干誅整偏師而奮伐身當幕北刀置鞞中聖謨洋洋皆授折衝之畧虎臣矯矯共懷敵愾之忠援枹不待於五申破竹遂成於三捷設壇而拜韓信仰歸善將之功置

酒而折隨何夫豈用儒之效幸封疆之載肅顧名器之
敢饗茲預策勲獨憂昧利伏望陛下灼知以迪有俊明
試而懋厥官特矜居寵之思姑底幹方之績許回渙號
用協師虞臣無任

又謝除檢校少傅表

臣某言伏奉告命除臣檢校少傅尋具辭免恭承批答
不允仍斷來章者全師勝敵偶當一障之乘孚號揚庭
許間三孤之列控忱詞而靡獲祗寵命以彌兢中謝伏

念臣策足諸生致身近弼聞俎豆未學軍旅之事洊叨稽
古之榮聽鼓輦則思將帥之臣忽誤謀元之選有衍新
疆之闕惟艱後務之承方從輕騎以渡瀘遽報殘奚之
闕塞聖謨先定載虔問罪之辭王旅適行共底侮亡之
罰時雨霈戎軒之捷迅雷摧賊壘之堅絕大幕以一空
肅昕朝而三賀無思不服時靡有爭民所欲而天必從
用迄駿功之定君之伐而臣何力亦饗信賞之加此蓋
伏遇皇帝陛下錫智表邦隆寬御衆誕敷文德坐恢有

指之疆肅將天威聿廣無前之績爰飭懋官之典肆疇
護塞之勤臣敢不益謹戎昭具遵猷告子年孤外寧忘
魏闕之心居定遠衰疲猶覲酒泉之身到臣無任

乞外任不允謝表

臣某言備負起部積媿空殮貳職銓曹重叨殊渥懇辭
弗獲恩指有加仰戴寵光彌增震惕中謝伏念臣材資
不腆識度非優初無飾已之智能粗有傳家之忠義逮
逢興運寢被異知擢自稠人游沐雲霄之澤久參法從

親承日月之光間繇顙聞之行丞預賜環之召式序在
位庶克有為疇若予工終無可錄已寬怠廢復玷超除
惟文昌之貳卿首天官之小宰力綿望淺事劇才難當
總核之具嚴顧選掄之曷稱此蓋伏遇皇帝陛下道兼
化育仁極生成徧覆包涵以作萬邦之人因任原省用
臻百志之熙乃眷庸虛亦加保惠臣敢不竭誠徇節奉
法守公夙夜所思固莫先於體國涓埃可効竊自誓於
捐軀臣無任

再乞外任不允謝表

臣某言忱誠上達覲有察於由中親翰俯頌顧弗容於
補外仰懷寵遇彌積震惶中謝伏念臣初乏異能久尸
榮祿既蔑聞於稱効宜崇降於疾殃乃始籲天敢云擇
地軒墀瀝懇已洊拜於溫言雲漢垂光更曲昭於至意
此蓋伏遇皇帝陛下仁深覆露道備生成謂衰難之可
矜尚眷存之勿舍雙鳬乘鴈雖不計於江湖去馬來牛
欲盡安於轅軛因加神筆以寵微軀臣敢不勉激懦衷

益堅晚節永言大訓豈特耀於雲仍竊竚此心固將捐
於頂踵臣無任

謝乞外任詔書不允表

臣某言軒墀瀝懇初閱俞音雲漢垂光更煩親翰頒溫
函而載渥控感臆以彌深中謝伏念臣本乏異能驟叨
殊獎無實之名可愧不腆之學易窮矧茲內務之隆夫
豈平生之望八埒日上眩金字之千言五閣雲深恍銀
臺之三昧食既浮而多懼力弗給而先疲居惟累國之

思進有籲天之請忱誠莫諒訓旨加隆此蓋伏遇皇帝
陛下智燭兼明道樞善貸雙鳬乘鴈雖無益於江湖去
馬來牛亦並安於轅輓乃眷欽崎之跡重紆焜耀之私
臣敢不欽命君師一心文字涓塵何有莫知稱報之方
溝壑未填俱効捐糜之日臣無任

謝賜詔書不允表

臣某言近奏乞減罷換階官除外任宮觀準入內內侍
省金字牌遞伏蒙聖恩賜臣御筆詔書所請宜不允勿

再有陳請者忱詞上達洵敢丐閑親翰中頒尚令代匱
曲煩褒勉彌劇凌兢中謝伏念臣奮跡竒艱遭時明盛
念終始典於學預闕聖作之淵微惟干戈省厥躬實昧
兵謀之颺忽茲領師屯之重載離歲厯之周轉喉幾雜
於殊音塞鼻坐屨於異饌同來吏士既盡去而莫留僑
寓妻孥殆兩忘而稀問覩有食浮之畏衰難力任之堪
凡四上於節旄復三祈於祠館此物此志諒無藉於多
人肆筆成書猶俾安於厥服申加訓指尤認眷存此蓋

伏遇皇帝陛下聖度兼容仁心博愛謂久參於帷幄察
及初終雖邈在於封疆待如疇曩未從冗汰以示慈憐
臣敢不勉務獨勞每如始至尚寧幹止第憑外治之敷
何以家為更懋前修之畧臣無任

謝乞宮祠不允賜詔表

臣某言今月一日上殿奏稟職事以病軀未安乞一在
外宮祠伏蒙聖慈特降詔書不允者彤墀賜對欣復望
於清光真館養痾獲縷陳於丹悃繼頒明詔尚閔俞音

中謝伏念臣稟性艱奇被眷優渥由寵榮之滿溢致疾
疹之窺乘偶緣江左之姦氓稍復龍韋之化就易鎮東
之舊治空慙郭馬之迎比密拱於行朝勢尤難於卧理
抗章請覲容瞻咫尺之威造膝輸誠敢避再三之瀆豈
圖寬政未忍投閑此蓋伏遇皇帝陛下道廓蓋容恩均
動植解衣推食每曲盡於下情補劓息黥尤垂憐於舊
物特紓清問深軫沉痾諭藥劑之寒溫辨醫工之良否
逮辭北闕仍叨蕃錫之光華既返東藩復拜溫言之煩

悉睿恩若此小已何堪儻薄技之未窮豈殘軀之足惜
敵鋒屢挫而未聞於退聽敢忘海徼之虞民瘼望瘳而
尚窘於催科益圖邦本之固有以利物是為報君

謝降官表

臣某言蠢愚闇事合寘嚴科仁聖原情止從寬典危衷
載惕感涕交垂中謝伏念臣初乏異能上辜殊獎緣去
國五年之久兼乘邊百慮之餘老將至而易昏技已窮
而難強遂貽罪悔重累眷憐此蓋伏遇皇帝陛下愛等

父師恩均天地未忘簪履之舊特霽雷霆之威故弗加
誅第令降秩臣敢不仰恩訓戒更務省循此玷未磨遑
及謀身之念後圖可免豈無補過之心臣無任

謝復官表

臣某言泉法流行稍逴曠官之誚綸音褻拂更叨復秩
之恩丐寢弗俞負慚罔措中謝伏念臣早緣誤簡嘗玷
近僚法出便民既預聞於曩昔奉身體國當自勉於今
茲豈識守分之常遂冒寵光之渥此蓋伏遇皇帝陛下

聖功日起睿澤時敷畀矜簪履之餘差錄絲毫之末特
加賞勸因示眷私臣敢不祗服訓詞益圖報効老之將
至願殫夙夜之勤知無不為用倡藩垣之治臣無任

謝落職宮祠表

臣某言原情議罪敢逭邦刑褫職示恩洊煩天造危衷
載惕感涕交零中謝伏念臣初乏才稱誤叨帥任頃以
抱疴而自列繼蒙易地以遙行承市駿之書垂代歸者
三日申丐閑之懇乃獲命於半途積愆已多逮此盡見

雖重招於清議終弗寘於嚴誅此蓋伏遇皇帝陛下仁
政旁通道心善貸矜其黽勉既凋犬馬之年假以生全
俾終駒犢之養臣敢不粗完晚節深念前非病矣何堪
徒有熏修之願闕然自視莫知報効之期臣無任

謝差提舉崇福宮表

臣某言准勅差提舉西京嵩山崇福宮者出司留鑰方
愧非宜改畀真祠更容自便恩私有腴感媿惟深中謝
伏念臣奮跡寒微稟資遲鈍文供世用偶逢千載之休

身被國恩嘗列四鄰之近形骸槁於遠戍思慮耗於多
虞逮還進讀之聯屢有退閑之請顧未棲於田畝乃復
玷於藩垣自愧無堪欲辭弗敢交符三日適當備預之
初祇命九天遽解劇繁之責此蓋伏遇皇帝陛下道樞
善貸智燭兼明察其不能假以終惠俾託醇醲之化遂
藏疲曳之軀臣敢不仰體睿慈誓堅晚節餘生未泯粗
知忠蓋之方九殞何難弗易險夷之守臣無任

寶章閣學士提舉西京嵩山崇福宮謝表

司戎避長誤陞學士之班刺郡乞閑遽領神仙之宅紫屨
辭而益峻恩過重以難勝昧所從來言之曷既伏念臣
家雖弓冶身本泥塗積半生州縣之間僅能免過脫萬
死干戈之際本不求知薦揚方徹於冕旒解后適更於
琴瑟黃緣超躡度越尋常英蕩觀風再轉即專於帥閫
蓬萊寓直三遷徑入於甘泉逮茲訪落之初又枉起家之
召始偷安於武部旋改貳於儀曹史觀地嚴亦容秉筆
邇英天近或使橫經已挺負乘之灾尚畀綵綸之寵非望

峻登於常伯得歸尚假於隆名自寶章創閣以來未嘗
建長釋古鼎專城之寄始遂投閑惟嵩嶽之外祠實洛
師之重地念昔已叨於均佚及今更喜於重逢禮在垂
車當掛冠於帝里義同賜杖容竊食於鄉邦莫名塊扎
之私未覺崦嵫之迫茲蓋伏遇皇帝陛下仁同天覆恩
與風行得博施濟衆之方示內恕及人之意俾臣身雖
遠外尚陪扈從之班知臣疾已沉綿更予支離之粟遂
使窮塗之士益增末路之光臣敢不堅節山林思忠犬

私力難報効但歌天保之詩職在禱祠請上華封之祝

謝魏王追封表

代韓侍郎師美
宋史政和五年二月追論至和嘉祐定策

功封韓琦
為魏郡王

臣某言錄勲念徃曲垂宸翰之褒錫命勸忠追極王封之寵訓於永世著在信書達幽壤以知榮舉衰宗而增感中謝伏念先臣某昔居相位兩翊聖朝身期盡瘁於皇家天實開先於盛運初不自伐久而彌彰仰逢睿主之繼承每荷淵衷之簡在臣頃叨乏使嘗對清光留聖問

之雍容及私家之紀述逮登塵扈獲奉燕閒蒙宣訪之
再三輒控聞於一二忽紆親札申降異恩雲漢為章俯
賁九泉之隱山川啟宇峻超五等之崇此蓋伏遇皇帝
陛下祇率前寧丕昭來孝潤色祖宗之業既底成功眷
懷社稷之臣遂疏渥澤臣敢不永思德意益謹義方小
已何堪始莫知於報稱闔門相誓終共効於靡捐臣無
任

謝韓魏王私錄宣付史館表

代

臣某言薦被溫言訪故家之私錄忽頒清詔增舊史之闕文恩極漏泉感深闔族中謝伏念先臣奮由一介逮事三朝昭陵立子之初首開大策慈壽御簾之際獨靖羣疑繼遵末命於英皇仰奉丕圖於神考雖輔翊艱難之節天實聞之若彌縫委曲之言人無知者臣嗣逢興運獲廁從班頻瞻黼座之巍巍數奉玉音之秩秩謂殄能伐善固非丙吉之本心而紀事成書必有鄴侯之遺傳咨詢既逮冒昧以陳乙覽歎嘉既錫芑茅之寵信編

論著益增汗簡之光此蓋伏遇皇帝陛下治假盈成功
隆繼述履至尊而制六合無疆惟休褒有德以懷萬邦
不顯亦世乃紆睿旨追錄前勞臣敢不勉激懦衷永思
先訓忠於君父不忘所報

開德府謝上表

代韓
師質

臣某言聯榮內閣已玷誤恩假守輔藩更分優寄密接
神都之近首承上德之流祇戴寵光彌增震惕中謝伏
念臣負能既薄用志亦迂塵力詩書粗襲先臣之學奮

身科第幸參多士之躔間關夙備於使令晚晚驟蒙於
眷渥追惟舊弼嘗輸社稷之勞訪逮嗣人超昇鄉閭之
郡比代還於北闕尋擢帥於南陽文陛延登玉音咨度
誦元豐之聖製審漳水之故阡親奉訓詞改隣丘壠俄
授符於全趙繼易地於澶淵三命茲共重叨屏翰再宿
曰信亟見吏民此蓋伏遇皇帝陛下躬秩大猷動遵先
烈念茲黎獻秉文之德對天燕及故家凡周之士亦世
因容微賤獲被生成臣敢不恪謹詔條布宣惠澤臨

民弗怠庶幾循吏之風報國是圖不愧功臣之嗣臣無任

大名帥謝表

臣某言伏奉制命除臣檢校太保建雄軍節度使大名尹大名府路安撫使再具陳免蒙降批答不允仍斷來章者起從真館付以陪都峻加視秩之榮仍易齋旄之重眷懷有腴感愧惟深中謝伏念臣奮跡寒微稟資遲鈍文供世用偶逢千載之休身近天光既閱十年之久

頃由政路出撫師干歲籥三周覺形骸之已槁都門再
入疑夢寐之初回矜憐曲軫於上衷顧語每康於玉色
惟是食浮之懼靡遑家請之安燕見所祈固及田廬之
卜隆私未慙尚叨藩翰之求已復預於謀元乃更霑於
進律此蓋伏遇皇帝陛下道樞獨運智燭兼明彊根本
以馭邊尤憐兩河之寄資典刑而用舊猥先一介之臣
因假龍光用昭體貌臣敢不仰祇訓指俯勵忠忱恩既
厚而不貲莫知稱塞力雖愆而可勉何愛捐糜臣無任

陝漕謝上表

代席修
撰貢

臣某言陞榮書殿將漕陝郊仰承訓告之嚴俯即封圻
之濶恩來望表感溢情涯中謝伏念臣識度非優材資
不腆偶身逢於盛旦偕器使於羣工越自郎曹遂塵宰
屬轉輸晉部實兼二敵之隣調餉朔陲幸迄三山之績
改茲劇任發自睿衷猥令魯衛之弟兄分總咸秦之兵食
入辭文陛親奉玉音層霄之照旁周零露之澤洽至此
蓋伏遇皇帝陛下欽明遠燭博大兼容善貸曲成體天

地而裕萬物原省因任作君師以佑下民是致疎微亦叨眷獎臣敢不堅忠許國竭節首公時和歲豐已腐關中之粟家給人足願流地上之錢臣無任

代張漕謝復官表

臣某言瀝懇自明幸逃疑罰推恩有叙冒進文階聞命若驚銘心知感中謝伏念臣材非挺特器本迂疎此復委於兩河已坐殫於五技日月逾邁雖強濟之蔑聞兄弟孔懷偶尤違之弗預仰蒙原察重荷生成此蓋伏遇

皇帝陛下明並日中仁同天大正名議罪昭其可免之情施德勸勞還以所增之秩臣敢不仰思訓戒俯罄忠勤當更誓於捐糜庶少成於報効臣無任

謝再復官表

代

臣某言慶澤時行幸蠲宿咎明恩還至叨復文階拜命震惶撫躬感勵中謝伏念臣少聞義訓初乏才稱自膺劇使於累年粗守愚忠之一節仰承詔令雖夙夜之惟虔退攷事功靡絲毫之可錄頻蒙遷叙重荷記憐此蓋

伏遇皇帝陛下聖度并包仁心溥博遵王之路公好惡以無偏何天之休錫臣民而咸被故如小物亦玷鴻私臣敢不深體生成益思罄竭誓以首公之志用伸報國之勤臣無任

謝降官表

代曹
漕坦

臣某言智昧察姦固宜重責恩從降秩深荷至仁聞命震驚撫躬戰慄中謝伏念臣材非挺特器本迂疎誤叨識擢之殊寔備使令之末列城仰給蓋心計之已殫愚

俗興訛乃風聞之不早既莫逃於吏議尚特屈於官刑
此蓋伏遇皇帝陛下聖度兼容道樞善貸施以生成之
惠薄其曠弛之誅姑申戒於庶工實曲全於小物敢不
勉圖來効務補前愆庶憑夙夜之勤少答乾坤之造臣
無任

謝降官表

代沈漕
純誠

臣某言民訛不察是謂曠官邦法有常止令降秩仰蒙
矜貸俯極震惶中謝伏念臣學昧通方器非致遠徒有

逢辰之幸遂叨將漕之榮妄愚肆惑於封圻晉闔殆塗
於耳目獄辭自聽既已麗於刑章使指弗虔固難逃於
吏議未加嚴譴迺出大恩此蓋伏遇皇帝陛下天覆地
容暘熙雲蔭雖循名而責實必以德而行仁曲軫睿衷
特從寬典臣敢不銘心思過悉力赴功冀少補於萬分
庶自湔於一節臣無任

謝降官表

代張
漕閱

臣某言庸愚冒昧當宜嚴科仁聖矜憐特從輕典危衷

載惕感涕交垂中謝伏念臣猥以凡材叨逢昌運一
門許國嗟華鄂之先凋半世莅官媿鈎刀之愈鈍逮茲
將漕曾未閱期初雖弗預於糴司比亦謬陳於稅議互
煩朝聽難逭邦刑既稍降於文階尚獲仍於舊服此蓋
伏遇皇帝陛下大明旁燭鴻覆蕪容每觀過以原情必
崇寬而加恕故如疎遠終荷生成臣敢不念咎省愆首
公盡瘁明時何報第殫奔走之勤皦日所臨更並捐糜
之效臣無任

謝降官表

時罷太
原帥

臣某言智昧修官亟彰繆戾恩從降秩實荷慈憐過大責輕感深涕實中謝伏念臣抱能不腆被遇非常八年瀛海之屯但縻廩食數月并門之寄未究綱條疲軀尚阻於造朝真館幸容於將母明非所積幽黜難逃薄伸懲戒之科深認生全之賜此蓋伏遇皇帝陛下仁參覆幬明並照臨總覈無偏雖謹曠瘼之罰驅馳有素必推全度之私故使孤危獲蒙矜惻臣敢不仰思曩眷俯訟

宿愆恭爾筋骸已乏可陳之力循茲頂踵不忘欲報之
忠臣無任

謝大觀改元赦表

臣某言號新歲建雲漢昭回恩首春行雷風鼓舞人胥
抃蹈物亦欣榮中謝竊以正月始和於焉布德而施惠
大觀在上所以藏用而顯仁惟好生之洽民心則設教
而服天下恭惟皇帝陛下率循堯道稽用夏時孝悌感
於神明休符沓至制作侔於造化曠典咸興得川珍嶽

貢而寶鼎成用聲律身度而大樂備授朔又朔乃推策以端朝開天之天因紀年而示象肆覃睿澤以格歡心罔不惟刑之恤哉茲謂有孚而顒若臣外叨分闡任實近民仰宣作解之慈共覩觀生之慶

謝星文赦表

臣某言天人昭假曷惠小心雷雨汪洋誕敷大有帝方視下氣可致祥中謝竊以星行乾端時見化國蓋靡常而偶至將因懼而寢隆頻有善言火為宋退苟無闕政

豈唐憂有孚曠蕩之恩克弭照臨之象恭惟皇帝陛下德敦孝友躬服儉勤體道以懷百神愛民而及萬物更茲寅畏益邁往初寬如堯舜之性仁謙甚禹湯之罪已一蘇率土交感上穹臣託備邊藩預班聖澤冀速瞻於丕應庶仰副於精誠臣無任

謝八寶赦表

臣某言天臨路寢方祗受命之符春動綿區更冒好生之德臣民溢喜草木均榮中謝竊以神物之興人謀莫

逮若地不愛其實則邦永孚於休恭惟皇帝陛下道妙
佑神功隆冠古稽文謨之肇造更秦璽之舊傳三靈相
之八者備矣聖有作而物覩其命維新福既斂而時敷
與民更始至於平施薦紳之士厚敷支統之親盡弛關
征載輕箠令撫荒夷之新附視剝俗以同仁是皆曠蕩
之恩益格和平之氣臣猥持從橐遠護塞垣側想天光
徒頌潤希之典仰承上德第虔寬大之書

謝八寶轉官表

臣某言珍符膺受渥澤流行預被寵遷實慚冒處中謝
伏念臣抱能不腆蒙顧非常守在蕃宣既莫窺於天作
名聯扈從又勿造於春朝緣盛福之時數偕庶工而序
進此蓋伏遇皇帝陛下道臻丕乂功集大成肇寶鎮以
奠邦明昭上帝揚王廷而孚號錫予善人肆均光榮橫
及疎遠不遺小物諒無雨露之偏莫報厚恩第効涓塵
之末臣無任

謝轉官表

臣某言官微善狀方懼譴訶恩逮積勞更遷品秩撫躬知幸戴賜逾深中謝伏念臣材實迂疎學非通敏徒以際逢之盛寢叨簡拔之私乘障何功但坐縻於廩稍賜書甚渥仍留任於藩垣無積最之可稱固黜幽之是待敢圖吏計俾冒朝榮此蓋伏遇皇帝陛下施德第功敦仁覆物王省惟歲無為而庶績凝道兼於天不賜而羣生遂大公所播小已均休臣敢不勉竭疲駑冀收塵露永惟序進或故常以為當然深認眷懷雖造次不忘所

報臣無任

謝賜御詩表

臣某言禁林夜直動鈴索以傳音宸筆春生捧雲章而
絢目顧羈臣之闊遇蓋近世之稀聞恭惟皇帝陛下儲
精泰初體道至妙位乎天德夙申兆聖之符合於帝庭
下治契賢之世還淳源於三古開壽域於八荒爰因霄
館之休成式導颺輿之降格嬰香夕薦星弁羣趨猥緣
內務之縻嘗有蕪篇之奏乘天地之正而御六氣之辯

曾莫測於真游通神明之德而類萬物之情獨獲闕於
寶畫放勛之文有煥帝舜之歌惟幾昭回睿藻之書蹈
籍先民之述臣雖遭甚盛詎稱所蒙持爝火而對太陽
之光可以息矣被短褐而懷垂棘之璧祇自懼焉永為
圭竇之榮觀更續玉堂之舊志臣無任

謝賜歷日表

臣某言觀象發春端朝頒朔詔音普至恩指交孚中謝
竊以乾元乘六龍以御天寧茲萬國閏月定四時而成

歲釐爾百工堯歷載欽箕疇式叙恭惟皇帝陛下體貞
道紀參妙化原仰嗣無疆更格五辰之順外裒有截並
陶一氣之和推步肇新宣加並被臣與叨委使敢怠遵
承願騰高廩之謌以應清臺之課臣無任

又

臣某言歷日月而送迎贊天地之化育惟后欽若俾民
丕承中謝恭惟皇帝陛下聖智研幾道心觀妙既朔又
朔衍神策於億年如烟非烟書卿雲之五色益謹授時

之法用遵序事之文溫詔具孚庶邦咸則臣猥分優寄
實預寵綏願因太史之占以作農夫之慶臣無任

又

臣某言太史觀天辨陰陽寒暑之序六服承式識分至
啟閉之期肇自京師匪頒羣國霜露所暨正朔攸同中
謝恭惟皇帝陛下歷數在躬天地合德體元居正以昭
王度迎日推策以授民時課候清臺不特務存於故事
詔依月令固將增廣於德心臣敢不奉以周旋少圖報

効臣無任

又

臣某言迎日肇端聖惟欽若授時頒朔民以靈承拜貺
有加窺文何幸中謝竊以王者大乎一統神心緯於萬
方乾元乘六龍御天所以首出庶物閏月定四時成歲
所以允釐百工曠然率土之間咸此序年之被恭惟皇
帝陛下妙參化育智及裁成冬無愆陽已慶同雲之瑞
天不愛道更瞻零露之祥載歌惟叙之功先行無疆之

歷臣猥當優寄實預寵綏正月始和仰體發生之德大觀在上益期富壽之風臣無任

謝賜詔書銀合茶藥表

臣某言輟宮闈之近御就賜明綸副薜劑之兼珍曲形寵數中謝伏念臣賦材不腆被眷非常授節帥垣已愧超除之峻進班從索又煩親詔之留仰憑宸算之經營俯幸邊隅之寧謐曾無威惠可實訓詞茂蕃錫以自榮惕懦衷而若厲此蓋伏遇皇帝陛下同仁遐邇博愛臣

隣乃並綏以汪濊之恩故樂有此光華之使勸功思報
宜頂踵之必捐已疾除煩庶涓埃之可効臣無任

謝賜詔書銀茶合表

臣某言金錯珍奩水蒼團璧斥附光華之使申加溫厚
之言仰戴慈憐俯深悸慄中謝伏念臣初聞祖訓親
遇聖知疇昔在庭弗為囊括中間避位實弛機張藩垣
寬閑歲之憂頂踵盡自天之賜敢謂記存之逮更隆錫
予之私此蓋伏遇皇帝陛下施德無疆念勞罔替坐瞻

玉關之久戍馳分桑苧之新烹曾不鄙於羸官良未忘
於舊物恩頒有腆禮遇非常捧次光生認天題之濕處
啜餘神往追風馭之冷然稍滌智昏益思忠報臣無任

謝入伏早下表

臣等今日伏蒙聖慈特降中使到院傳宣奉聖旨入
伏早下者暑令金藏曲軫至慈之念恩言天降俾從夙
退之私中謝伏念臣等猥以凡材對司內務鑒坡地秘
已露殿閣之涼鈴索聲稀每幸文書之靜深惟榮遇實

愧空餐敢圖加惠之優更遂自公之逸此蓋伏遇皇帝
陛下道參化育治格平成養萬物而播清微之風運六
氣以順赫曦之紀迺下隆寬之令特紓執熱之勤伏當
早歸尤謹偷安之戒日惟不足益懷盡瘁之忠臣無任
謝賜對衣金帶鞍馬等表

臣某言出襜裳於御府束以環金引逸足於天閑副之
繚轡寵光薦至震惕彌深中謝伏念臣學昧美身材難
致遠偶親逢於盛旦遂踐歷於華塗在垌之馬思無邪

既繫維之是就如子之衣安且吉曾蕃飾之已多敢緣
因任之求更冒匪頒之渥此蓋伏遇皇帝陛下如天覆
物以道馭臣顧雖卑賤之軀亦假便蕃之數不稱其服
終無濡翼之功既閑且馳徒誦卷阿之義其如報効已
誓捐糜

又

臣伏蒙聖慈以臣入院特賜衣一對金帶一條并魚袋
金鍍銀鞍轡馬一匹者擢承密命方拜寵於昕朝跼聽

臚傳更加榮於好賜禮雖有舊眷則非常中謝伏念臣
本乏異能寢叨殊獎愧高華之弗稱知焜耀之已多從
容而不貳衣徒謹都人之尚蕃庶而用錫馬敢興晝接
之求獨緣任使之私復冒匪頒之渥此蓋伏遇皇帝陛
下恩被動植道馳人羣特優儒學之臣用廣文明之化
垂帶而厲固自視以匪紓叱馭曰驅當益鞭其不逮

又

臣某言在筭頒衣兼金賜帶引內閑之駿絕副寶較之

華鮮拜貺有加撫躬靡措中謝伏念臣外叨方任初乏
治稱進近職以薦留已塵渙渥哀多儀而下逮載冒寵
章遠而有光獲以為幸此蓋伏遇皇帝陛下仁豐而博
物舊亦憐層霄之照旁周零露之澤狎至不稱其服曳
婁敢怠於再思既閑且馳矍鑠猶堪於一據永懷報効
竊誓捐糜

謝賜生日羊酒麪表

臣某言閭史書年茲劇劬勞之感饗官致餼更叨優渥

之私焜耀有殊震惶靡措中謝伏念臣少知嗜古長昧嚮
方偶膺宅俊之求亟踐疑丞之任陳謀每下徒招浮食
之譏曠日既多重識包荒之度敢圖隆眷俯記始生矜
其霜露之恩憐以雲天之澤此蓋伏遇皇帝陛下寵綏
近列率籲庶常若時好賜之所加不以罔功而輒廢洎
親有祿嗟莫遂於素心教子以忠誓弗愆於慈訓臣無
任

又

臣某言伏蒙聖慈以臣生日特降詔書賜臣羊酒米麪者左弧六射方懷顧復之初細札十行式示匪頒之渥載惟焜耀彌切震惶中謝伏念臣跡本羈單學非通博授經摘句少獨費於母勤行已莅官長更煩於父誨誤叨殊獎驟列近司君親臨之幸灼知於小諒日月出矣愧絕跂於清光敢謂始生猥蒙垂記此蓋伏遇皇帝陛下仁先毓物禮備養賢瞻其風木之思假以露蕭之澤祿焉弗洎尚奚事於家為軀也可捐固莫忘於國爾臣

無任

謝賜器甲表

臣某言伏蒙聖慈特遣睿思殿供奉黃珣賜臣器甲儀
物等師徒爰整當出車建旄之初儀物載頒兆彤弓旅
矢之慶拜恩憂溢撫已心營中謝竊以南仲總戎美簞
第鈎膺之飾吉甫承命絢織文鳥章之華惟雨露之新
恩契簡編之舊事特出上方之戎器大振中壘之軍容
何龍盾虎韞之足云蓋垂矢兌戈之不啻一時重任愧

郤縠詩書之敦萬目紫觀有秦仲車馬之好此蓋伏遇
皇帝陛下重華協帝下武繼文俯念舊邦塗炭之民盡
復中國耕蠶之地敷德以滌舊汙之俗謀師以撫新造
之邦練日時之吉而立大將之旗森劒戟之衛而壯元
戎之隊臣敢不夙駕盡瘁挾纊均溫圖於疆於理之功
在既來既平之後仰遵睿算唯求邊鄙之安遠震皇威
漸格干戈之戢臣無任

謝賜臘藥表

臣某言伏蒙聖恩賜臣御筆金花牋詔書臘晨風藥一
銀合者歲時軫念不忘遠戍之勤藥物如珍更假溫言
之寵觀瞻改色感愧裝懷中謝伏念臣本自羈單過膺
獎用既以一身而許國敢辭九死以乘邊多病早衰寢
覺形骸之槁窮冬急景乃知節令之新淒其雪席之霏
叨此雲章之錫丹砂玉札有來仙劑之良翠管銀鑿猶
識恩光之舊此蓋伏遇皇帝陛下同仁中外誕保臣鄰
睠茲簪履之餘守在封疆之邈曲垂慰藉以示記存臣

卷八
敢不仰體至懷俯堅素節欲圖來効但虞旅力之愆倘
弛餘年庶遂生經之衛誓捐糜於頂踵思稱塞於涓埃
臣無任

賀淵聖皇帝登寶位表

臣某言伏覩赦書皇帝陛下登寶位者皇天祐我下民
佑啟承乾之運聖人位茲大寶聿膺御歷之符神器有
歸邦基永固中賀恭惟皇帝陛下聰明日就睿哲生知
毓德儲闈早繫天人之望紹休帝祚益增社稷之昌臣

仰託照臨惟胥鼓舞雖同羣目幸瞻日出之光第遠辰
居莫預衆星之拱臣無任

賀受八寶表

臣某言惟天申命乃聖成能即春大朝受國新寶函覆
所被呼舞攸同中賀竊以器不相沿文因久息形而上
者謂之道先得於斯神而明之存乎人夫然後作及其
成也又有相之恭惟皇帝陛下德業大成治收假溢考
舜工而制樂續禹緒而鑄金命適至於湯齊事悉臻於

卷四
周備載更八紐示永賴於流傳永祚億年為無窮之保
用臣恭想大廷之拜貺實均庶類以承休

賀立皇后表

肇正宮闈丕承宗祏天地相合神人以和中賀竊以媯
汭觀虞塗山啟夏姜來胥宇蓋亶父之由興姒嗣徽音
乃文王之所聖內隆懿德仰屬熙朝恭惟皇帝陛下率
禮範民以身行道監於成憲欲治國齊其家弼我不基
既受命立厥配時惟茂典繹以庶言矧偕龍御之升更

協蟲飛之夢樂只君子永綏逮下之休至哉坤元共賴
承天之德臣厚叨睿眷慶倍羣情第譌彤史之光莫預
紫庭之賀臣無任

賀宣示御書明堂太室字并圖樣表

臣某等言神廷肇造親援翰以正名聖畫誕敷首揭圖
而底法仰承昭示咸預榮觀中謝竊以六經千載之傳
明堂為大四阿重屋之位太室居中道與世殊事隨時
異奉高汶上鄙漢祀之何稽東都乾元陋唐儀之弗典

惟王建國嚴父配天將專對於靈休乃肅開於寶構分
其五室度以九筵陰陽通八卦之方上下畫二儀之象
宸毫中運極雲漢之昭回繪事甫班見規摹之宏遠恭
惟皇帝陛下玩心昭曠凝命穆清天聰天明方輔惟馨
之德我將我享更隆伊嘏之恩用垂永世之光爰啟合
宮之議煌煌墨妙蓋將聖而多能奕奕翬飛實自我而
作古臣共欣先覩竊猗慶成榜以寧神當從仁皇而增
美按茲考室知非玉帶之能窺臣等無任

謝賜御書千字文表

臣某言伏蒙聖恩賜臣御書草聖千字文一軸者寶跗
天運仰勤萬乘之尊蓬戶春生俯拜千言之寵紳綏改
觀都邑驩傳荷隆眷之有加闔宸宗而歸感中謝竊以
上古結繩而治誕先有作之文聖人肆筆成書默合自
然之妙繇河出負圖之兆暨神資雨粟之符篆籀之法
滋興真藁之源繼起粵若杜崔之所尚與夫張索之相
高雖窮千形百體之工未究四闢六通之道至神天縱

大巧生知成能參造化之初游藝絕名言之表洞章簡
錄焜煌魁斗之威璇榜雲楣卓犖奎鉤之象至於雷擊
電奔之逸尤極龍騰鳳翥之奇書契以來帝王第一顧
如臣者敢有求哉比瞻法坐之光咨逮詞林之秘因垂
嘉獎欲遂寵綏退傳溫旨於複門快睹珍藏於同舍泚
金壺而霏潤爰下九天捧玉軸以舒華併茲一日共識
摛文之盛獨慚稽古之榮此蓋伏遇皇帝陛下覆冒庶
常并包衆甫顯諸仁而藏諸用鼓舞惟神得於手而應

於心昭回在下特假露蕭之澤俾安風葦之棲爭醉墨
於御牀彼非其分冠寶章於家集孰得而踰臣報國無
堪誓心已確終幸里居之請晚惟宸翰之依談際遇於
鑾坡遠從耆舊託護持於恒嶽永燕雲來臣無任

進御書手詔碑本表

臣某言伏蒙聖恩賜臣御筆手詔以摹勒上石者中謝
竊以金聲玉振服聖訓之高明鳳翥龍蟠仰天章之煥
爛已謹緘滕之固更祈琬琰之傳河圖洛書邈前人之

制作皇墳帝典貽萬世之規模豈徒為臣子之榮抑以大華夷之觀謹馳墨本上進宸居冒瀆天威無任戰越之至

謝賜御書神符表

臣某言近因進對伏蒙聖恩許賜神符今月十七日中使奉傳聖旨賜臣御書大符一軸上有星斗象及勅文寶字者玉音咨逮嘗矜飭舍之卑雲篆傳觀特錫飛符之秘旄倪銘意崇厲翦形中謝竊以上帝佑民而作君

聖人以道而莅世有德司契其鬼不神鼓舞挈提自我
四闢六通之化揮斥効召存諸三元八會之文故伏羲
帝堯秉中皇之章而祝融高陽服太一之號金真玉璽
赤舄黃書飛日景之光華乘星精之豁落並出始青浮
黎之土丕昭火鈴神虎之威自非降九霄以應期孰可
攝萬靈而肆筆昊天其子下民之王拂素流丹駭龍蛇
之起陸結空布烝脩山嶽之藏雲勅河則馮夷為之收
波救旱則靈澤為之興雨豈但束妖而馘毒蓋多起死

以肉骸如臣何知被眷既渥尚以攸居之陋曲煩丕燾
之慈闢乾闥坤親灑洞章之妙歷箕旋斗用綏蔀室之
寧此蓋伏遇皇帝陛下御六氣之辯於無窮行萬物之
上而不慄精神所運變化乃成焜煌初出於毫端恍惚
已形於宵夢天威咫尺惟均奠枕之休神物護持無復
嘯梁之懼臣敢不闔宗齋戒畢命歸依善救人故無棄
人愧難酬於大造雖問道亦未聞道誓更迪於真風臣
無任

謝宣賜御筆書明堂等字表

臣某等言正位凝命肇營嚴配之宮肆筆成書妙極昭
回之象仰蒙廷示俯遂管窺中謝恭惟皇帝陛下聖學
研幾孝心致至我將我享務隆伊嘏之恩天聰天明欲
達惟馨之德謂王者成萬化於一堂之上而聖人播五
行於四序之中考六經互見之文蕪三代相因之制聽
十二之朔用即廣居度九尺之筵是興重屋黜東都乾
元之議鄙奉高汶上之規仰圖而有飛星出柳之占儼

功而有大本浮江之瑞乃親翰墨預定榜題雲物舒華
奎躍動彩鳳翺其羽體自鸞翔龍游在霄勢尤夭矯蓋
天機之中運必造精微想帝鑒之下臨亦深悅喜臣逢
辰竊幸刮膜更榮永觀厥成俟休功於不日用宏茲賁
垂寶訓於無疆臣無任

賀燕樂成表

臣某言天地同和不應文明之運君臣相悅肇新安樂
之音盛冠古初歡均遠邇中謝竊以笙鏞列於舜陞無

相奪倫管磬設於周庭既備乃奏永觀有作之聖茂對
非常之時間出異人贊紹堯之獨智前興神物告續禹
之成功用能參六籍之傳自然起一代之樂協於度數
燕及家邦恭惟皇帝陛下躬秩大猷動遵先烈四方其
訓禮已合於乾亨九叙惟歌德更崇於豫順比中聲之
來上即更坐以縱觀百獸率而鳳凰儀豈獨娛於羣后
萬物育而星辰理實兼佑於吾民臣叨守近藩側聞慶
事清光在望空馳魏闕之心妙道難名敢賦咸池之頌

臣無任

大名奏教成新樂表

臣某言和樂象成四達寰區之遠陪都享上一新旬月之間協氣絢綸羣心愷悅中謝竊以道德出於聲文之妙教化行於燕饗之歡八音克諧則庶績熙五者不亂則萬邦乂時惟聖作實與政通恭惟皇帝陛下孝奏神明智侔造化以日就月將之學致地平天成之功鋪張三靈之休跨越百世之盛身為度聲為律得以自然徵

為事角為民按之大備著於詔令頒逮藩垣潛滋動植
之榮丕變耄倪之聽臣誤叨居守幸預承宣密隣首善
之畿仰體統同之意尹人祗辟曾無補於泰辰易俗移
風共竊謏於淳烈臣無任

賀流星出柳星表

臣某等言合宮經始隆聖制於雉門垂象飛光顯休符
於鶉火神謀先定天意允昭中賀竊以自昔造邦但窺
營室若時正位亦考極星因體國以辨方乃求端而從

事詎有非常之應見於有作之初惟流星出柳之占蓋
明堂僞工之驗喜歸宗廟慶在睿躬恭惟皇帝陛下祇
紹丕圖通追前烈濬發光明之學肇興嚴配之恩以一
日萬幾之餘稽五室九筵之數斷自獨智告於大廷文
考在天將顧懷於達孝上帝有命肆申錫於嘉祥赫然
貴使之輝相此重屋之建臣叨聯輔弼莫測感通永觀
厥成預罄斯干之詠用宏茲賁益恢大壯之規臣等無
任

賀火星避心星表

臣某等言火行有度循列舍以將經帝德所移越三星而亟過上天純佑率土交欣中賀竊以復見往來具垂於象緯疾遲留退爰示於機祥惟熒惑淳耀之精受太微司察之制當秋之後歷氐及房絕去忽高順動且速避心宿之上踰二百分出豫野之躔無十數夕不犯不守俾熾俾昌恭惟皇帝陛下視遠惟明為國以禮道既光於四表治兼撫於五辰方申命以用休聿懷多福宜

觀文而察變無有後艱煌乎炎德之符燕及天王之位
仰照臨之不忒推壽考之無疆臣等初乏管窺幸瞻隆
暑火主聖運豈止景公徙舍之占心為明堂預識周家
嚴父之應臣等無任

賀日食不及分表

大觀元年十一月朔臣某言日行有常在數當食天意
所佑其光不虧凡預觀瞻舉同欣抃中賀竊以兩曜更
照不分交會之期二徑相推遂驗淺深之度比者仲春

之朔見於南斗之躔圓儀積厚而可占太史先天而以
告惟至神之助順垂景貺以照臨陰弗侵陽星能禦侮
明離增熾已遲午正之時協氣正騰不滿半彊之數恭
惟皇帝陛下道齊七政德撫五辰定鼎鼐以象功崇宗
廟而致孝宜無疵慝永底和平矧二至相過而非災實
一人有慶而允賴臣造庭不果徒傾葵藿之心拭目以
觀願頌岡陵之福臣無任

賀日有戴承氣表

俊德昭升上穹純佑大明久照瑞氣相輝瑩視所同歡
聲咸暨中賀竊以君道象日天占在人氣氤上騰蓋叶
同心之戴絢爛下映乃符丕命之承萬有千斯二者並
見恭惟皇帝陛下中正履位文明應天粲然殊特之祥
集此光華之旦昔章聖岱宗檢玉抱戴效休陛下路寢
受圭雲物薦祉紹膺景貺丕顯成功臣職近宸嚴任叨
都會親遇豐亨之慶願賡時邁之謌臣無任

代周提舉作賀冬至朝會受圭表

臣某言陽氣潛萌天心允格肆臨路寢恭受珍符基祚
增隆華夷溢喜中賀竊以二帝三王之所作蓋傳上古
之書九州四海之既同有告成功之器茲為神物以俟聖
時恭惟皇帝陛下德備堯仁道兼禹智巍巍丕績茂昭
祖宗之烈光穆穆盛容欽承天地之大寶卜年有永如
日方升臣叨領使華阻趨朝綴竊慶非常之會但騰惟
叙之歌

又

臣某言迎長化國方乘陽復之亨展采路朝克受天之瑞有生共慶振古未聞中謝竊以堯之為君欽明而蕩蕩禹之行水勤儉而孜孜故百工庶績之咸熙而六府三事之允治既鑄鼎以象物乃錫圭而告功五帝殊時萬世一遇恭惟皇帝陛下內明俊德外好善言尊天則歷象日月星辰祇已則左右準繩規矩睿文有煥淵智不矜樂感民和遠秩文章之作疆開徼外更踰下土之敷格在帝心震於神物瑑以雲油而雨霈形其天銳

而地方舉肆覲之上儀會同嘉叙御非常之大寶啟迪
純禧願陪來賀之班但祝厯年之永

又謝賜玄圭集議冊表

臣某言天瑞告成皇模稽古庶言載繹大典肆頒中謝
竊以妙通神明則有非常之應盛超今昔則有無窮之
傳蓋天弗違惟道乃久恭惟皇帝陛下堯德廣運禹功
平成曠然覩見之祥申以疇咨之議昭受上帝屢播詔
音鋪張闋休是存鉅冊臣幸叨寵錫竊快榮觀願偕敷

土之書永作藏家之訓

賀上元開封獄空及路不拾遺表

臣某等言國家閒暇盛元夕之豫遊囹圄空虛屬神都之嘉靖俗更敦於廉慤義不取於墮遺書信牘以有光播綿區而交慶中賀竊以周德厚成王之世方底措刑魯邦聞孔子之風遂無拾路惟輦轂浩穰之舊宜歲時抵冒之繁今乃民協於中罔干予正至若貨棄於地不必已藏蓋摩義漸仁親覩聖人之作故遷善遠罪首同

大道之行恭惟皇帝陛下德與氣游政從網舉有孚翼翼之邑於變熙熙之臺月當春王正之中殆無居者人篤士君子之行靡犯有司獄無兩造具備之辭市有三日後舉之物賞亟行於象魏威盡弛於桁楊臣竊幸丁辰共深歸美有耻且格莫窮鼓舞之神無疆惟休但罄形容之頌

賀大理寺去年並無斷過大辟表

臣某等言民變時雍初鮮有司之犯吏登歲會訖無重

辟之書凡在肅臨共勤呼舞中賀竊以堯舜之隆尚矣
但晝衣冠成康之治休哉獨空囹圄逮及馭威之密格
茲去殺之稀服念五六至旬時之言莫知胥訓所斷二
十有九人之事已聳前聞惟盛旦之孚休俾嘉師之遠
罪自觀象於正月之吉迄飭典待來歲之宜厯稽廷尉
要囚之文靡有士師泣戮之命恭惟皇帝陛下道樞貸
物慈寶鎮邦正本清源律設恢恢之網漸仁摩義風移
皞皞之民宜有極功臻於平國天府授中而計獄止列

寬科史官記事以繫年肇新凡例臣等幸叨修輔咸仰
好生維春之祺固大開於壽域播刑之迪將益廣於德
心臣無任

賀三山天成聖功橋成表

臣某等言經瀆趨山百神受職浮梁枕石萬世賴功息
解繫之歲勞扼高深之天險號名中出謳頌共傳中賀
竊以導河大任茲惟禹迹造舟渭渙有若文謀於皇先
帝之遠圖首發永橋之宏議天開地闢實待聖時山盈

川冲自全坤勢奮不疑之獨斷迴欲倒之狂瀾三峯屹
於屯雲四崖堅於削鐵雙流既東千艦可縻巨柱相通
跨東西之秋漢中阿特起貫南北之晴虹邦其孚休民
不病涉恭惟皇帝陛下昊天其子上帝是依環神鼎以
定八方寶玄圭而宅四隩陋鄭人之輿濟因周民之子
來靡牽胥動之言用訖丕承之烈興國家長久之利不
日而成壯道德安彊之威自今以始臣莫裨允翕竊預
榮懷聽行路之驩呼想殊鄰之震愕徧哀海嶽願揚不

世之光咸造軒墀敢上無疆之壽臣等無任



